

Dua OKU bukti kemampuan

Kekurangan diri tidak halang lanjut pengajian di UniSZA

GONG BADAK – Keadaan fizikal kurang sempurna tidak menghalang kesungguhan dua pelajar OKU untuk meneruskan pengajian di peringkat diploma di Universiti Sultan Zainal Abidin (UniSZA) bagi sesi 2016/2017.

Kedua-dua pelajar itu, Normelisa Mohd Yadi dan Atifah Aishah Rosli, 18, merupakan antara pelajar yang memperoleh keputusan cemerlang dalam peperiksaan Sijil Pelajaran Malaysia (SPM) tahun lalu.

Normelisa yang cacat kedua-dua kaki sejak berusia 11 tahun akibat demam panas, memilih program Diploma Pengajian Islam (Bahasa dan Kesusteraan Arab).

“Saya sangat gembira kerana berpeluang melanjutkan pengajian di UniSZA, yang merupakan pilihan pertama saya. Saya juga yakin dengan segala kemudahan disediakan di sini untuk mahasiswa kurang upaya seperti saya.

“Saya memilih kursus pengajian Islam kerana bercita-cita menjadi pensyarah Bahasa Arab di universiti ini satu hari nanti,” katanya yang merupakan anak kedua daripada enam beradik.

Normelisa yang memperoleh keputusan 10A 1B dalam SPM juga yakin dia dapat meneruskan pengajian dan kehidupan dengan baik di universiti itu, sekali gus membuktikan dia juga mampu berdikari.

Sementara itu, Atifah Aishah berkata, tiada kata-kata dapat digambarkan apabila impian untuk melanjutkan pengajian di UniSZA tercapai.

Menurutnya yang mengalami masalah fizikal rendah sejak kecil, kekurangan diri bukan alasan untuk dia tidak berusaha, sebaliknya dia mahu membuktikan kepada masyarakat yang

golongan istimewa juga mampu berjaya.

“Saya sudah biasa dengan keadaan ini (masalah fizikal) sejak di bangku sekolah. Insya-ALLAH, saya mampu berdikari di sini (UniSZA), meskipun tanpa keluarga di sisi.

“Impian saya tidak lain untuk membantu ibu bapa, sebab itu saya mahu belajar bersungguh-sungguh agar impian menjadi pensyarah tercapai,” katanya ketika ditemui pada Majlis Penutup Minggu Mesra Siswa Pelajar Diploma UniSZA sesi 2016/2017 di Dewan Perdana, UniSZA Kampus Gong Badak.

Atifah Aishah yang memilih bidang Pengajian Islam (Syariah) berkata, memang diaku masih ada sesetengah masyarakat yang memandang serong dengan keupayaan golongan istimewa, namun itu tidak sesekali mematahkan semangatnya.

Sementara itu, majlis perasmian disempurnakan Timbalan Naib Canselor (Akademik dan Antarabangsa), Prof Dr Mahadzirah Mohamad. Hadir sama, Timbalan Naib Canselor (Hal Ehwal Pelajar dan Alumni), Prof Dr Nik Wan Omar.

Sesi pengambilan kali ini membabitkan seramai 669 pelajar terdiri daripada 205 lelaki dan 464 perempuan, melibatkan pelbagai jurusan daripada lapan fakulti yang ditawarkan.



Atifah Aishah (dua, kanan) berbual mesra dengan rakan yang turut mendaftar sebagai pelajar baharu di UniSZA.

